

30 MAI
RUGĂCIUNEA
SF.CUVIOS-MĂRTURISITOR
ISAACHIE DE LA CONSTANTINOPOL
Молитва

Православия ревнителю и ереси обличителю, Церкви поборниче и иноков похвало, преподобне отче наш Исаакие! К тебе во умилении сердец наших притекаем и твоя помощи ко спасению нашему просим. Ты бо пророку Божию Илии поревновал еси и царя злочестиваго не боязненно обличил еси: ты к познанию веры Православныя того увещевал еси и от него поругания и злострадания радуся претерпел еси. Вразуми убо и нас молитвами твоими Евангельское благовестие неизменно соблюдать и всякой ереси противостояти, искушением же от многострастных плоти нашея, от мира сего и от диавола бывающим противитися. Научи нас во храмах Божиих неленостно собиратися и по вся дни покаяние Господеви приносить. Веруем и уповаем, угодниче Божий, яко не вотще благолепнейшая во стране Российстей церковь в царствующем граде [нашем] волею Божиею во твое имя создася, но да вси православнии, от всея страны нашея во храм сей притекающие, на подвиг твой взирающе, вере твоей подражают. Испроси убо, преподобне отче Исаакие, благоверному Царю нашему здравие и спасение, на супостаты же одоление, пастырем Церкви о спасении верных ревность, всем же православным христианом в вере единомыслие и в

любви преспеяние, усопшим же блаженное упокоение, да сия вся молитвами твоими восприимлюще, купно с тобою прославим Бога, дивнаго во святых Своих, в Троице славимаго, Отца и Сына и Святаго Духа, ныне и присно и во веки веков. **А**минь.

